

V I R O ,

P A T R O N O S T U D I O S I S S I M O ,

A M I C O O P T A B I L I O R I ,



M. STEPHANO DEMARS,

Equiti, Regi à Commentariis, &c. &c. &c. &c.

Reverentiæ, grati semper animi monumentum

DICAT, VOVET ET CONSECRAT

Obsequentissimus & devotissimus;
Joannes-Baptista CALMÉ, Baccalaureus
Parisiensis Medicus.

V I R O

P A T R O N O S T U D I I S S I M O

A M I C O O P T A B I L I S S I M O

M. STEPHANO DEMARS

Episcopi, Regi & Communitatibus, &c. &c. &c.

Reverentibus, grati semper animi monumentum

DICAT, VOVE ET CONSECRAT

Obsequium et devotum
Stephani DEMARS, Baccalarius
in theologia

DEO OPTIMO MAX.

UNI ET TRINO,

VIRGINI DEI-PARÆ, ET S. LUCE,

Orthodoxorum Medicorum Patrono.

BIU Santé
Médecine
Paris

QUÆSTIO MEDICA

QUOD LIBETARIIS DISPUTATIONIBUS

*manè discutienda in Scholis Medicorum, die Martis vigesimâ
mensis Februarii, anno Domini M. DCC. LXXXVII.*

M. FRANCISCO-GASPARDO DIDERON, Doctore Medico,
Præside.

An ex omni utriusque venæ cavæ sanguine, bilis formatio?

I.

^A
O altitudo naturæ divitiarum, fons prodigiorum inexhaustus! Materia igne penetrata celesti, jam spirat, æthereo fruitur lumine, indefinente motu peragitur, certis pro sua specie & indole legibus obtemperat. Dum quæque tum animantium, tum vegetantium species ad occasum (retrogrredi nescia) vergit, nascitur ex uberrimo sinu, tanquam olim ex Deucalionis & Pirrhæ faxis, mortalium nova progenies veterascentem quasi eliminans. Humana autem gens, improbo societatis beneficio, ab amplexibus recedens naturæ, huc & illuc, circum-eunte Eumenidum turbulentâ catervâ, præmaturo letho devolvitur. En uberrimæ matris jura vindicans, inter artes præstantior Medicina, quæ continuò invigilans, non solum humano generi longam sub cœlo comparat viam; verum etiâ incautas quotidie faucibus Orci victimas eripit. Artis Medicæ fundamentum est intima corporis humani cognitio, sicut & notitia legum quibus in statu sano movemur. Filo anatomico tutius ducti, omnes ingeniosè corporis Mæandros evolvunt Physici. Actio jam digestionis, chylicationis, sanguificationis, noscitur; jam fabrica cordis exquisitissima sensibus patet obvia. Quantum autem totâ viâ aberrare nobis videntur qui, de centro ad partes externas; de partibus externis, ad venam cavam sanguinis motus gnari, ultra prosequuntur, & sanguinem in statu sano, ab auriculâ dextrâ, cor denuò, rursùm, iterùm & iterùm permeare contendunt. Porro ea est humani ingenii imbecillitas, ut sæpè sæpius rerum umbras & inania capter. Sacræ antiquitatis immemor, audax Japethi genus doctrinam multorum experimentis sæculorum suffultam penitus obruere plerumque tentavit, & stultè sacrilegum, leges imposuit naturæ de quibus hæc irrigit inconcussa. Cursum sanguinis & recursum in arteriis, non immeritò, adscribebant antiqui melioris

notæ Medici; undè fluidi columna in motum indefinenter acta, assiduò novas parietibus vasorum pertusis offerebat summæ divisibilitatis capaces moleculas quæ omnes in corpore vias, nutritionis causâ, penetrare valebant. Circulationis autem Harveianæ sectatores plenis vociferantur faucibus: « Tantâ cum velocitate à venâ » cavâ, in ventriculū cordis dextrum; à ventriculo cordis dextro, in pulmonum » substantiam; à pulmonum substantiâ, in ventriculū cordis sinistru; à ventri- » culo cordis sinistro, in aortam; ab aortâ deniquè in omnes corporis partes irruit » sanguis, ut in tribus horæ minutis, cor iterum ingreditur. Reseca, alliga, » profunda inflige vulnera, heterogeneos in vasa tum cadaverum, tum spiran- » tium liquores validâ propelle manu, naturam immanè jam dudum sub vinculis » & cultro gementem, dies in dies crudelior, opprime, & tibi luce clarius afful- » gebit nostri doctrina magistri; sic per morbum, quid sit sanitas intelliges; sic » per mortem, quid sit vita cognosces.» In Harvei sententiam, & in veterum juxta sanguinis motum, opinionem, medium à nobis calcandum est iter, undè palam faciamus quomodo Harveianæ circulationis decipiuntur sectatores; undè veterum in æquo, sententia vindicari possit (1).

I I.

VITALEM præcipuam functionem quâ sanguis à corde per arterias in omnes corporis partes traditur, & per venas, ad cor reducit, circulationem nuncupant Medici. Circulatio tamen jamdudum celebrata, præter naturam experimentis, & ad probandum infirmis observationibus suffulta videtur.

PRIMA EXPERIENTIA. *Vas aperiatur, omnis ferè sanguis deperditur.* Generalior autem illa assertio.... Minor etenim ex venâ, quàm ex arteriâ, pro capacitate vasorum (2), illorumque mutuo consensu (3), sanguinis copia funditur. Verum enim verò secetur arteria.... proximis in ramificationibus contentus sanguis, adjuvante arteriarum systole, vas apertum recurrit; pulmones pervagans, indefinente respirationis motu, sanguis ad sinistru cordis ventriculū redux, aortam ingreditur arteriamque protinus adit apertam ubi minorem experitur

(1) Harveianæ circulationi reclamaverunt *Riolanus*. Nova doctrina de motu sanguinis. Paris. 1649.

Gaspardus Hofmannus. Digressio de circulatione sanguinis. Paris. 1652, in-12.

Fortunius Licetus, in Epist. 37 ad *Bartholinum*.

Homo-bonus Pison, in ultione antiquitatis, & in disquisitione de circuitu sanguinis. 1726.

Schillingius, in disputatione Basileæ 1679.

Eccardus Leichner, de motu sanguinis, exercitatio anti-harveiana Arnstad. 1647, &c. &c. &c.

(2) Judæi exquisitè acuto cultro juguli arterias resebant, ne sanguinem cum carne edant contra legem Noachicam & Mosaicam. Genes. c. xvii, Levitic. 13, 14.

(3) Pro vasorum tum utriusque maxillæ, tum nasi cum carotidis consensu, ad mortem usquè effluxit aliquandò sanguinis copia ex gingivis, ex naribus, ex maxillis, evulso potissimum dente molari. *Rumier*. observ. 72. *Nicolaus Fontanus*, curat. & respons. p. 171. *Lanciscus*, de subis. mort. l. II ad finem. *Christinus*, hæmatol. p. 285. *Buchner* miscel. med. p. 932. *Baronius*, de pleuropneum. p. 293. *Salmuch*. observ. 20. *Funesta*. Phil. Trans. n. 208, &c. &c.

resistentiam. Porro majorem minoremve fluidi copiam pro vasorum dispositione, pro succi alimentaris naturâ, cor accipere existimari posse videtur. Summâ etenim levitate donatus, omnique acrimoniâ expers chylus, copiosior à ventriculo cordis dextro fugitur, ut abundè patet in nutricibus quæ farinoso indulgentes cibo, majore lactis copiâ luxuriant. In statu physiologico, Dedaleis vasorum divisionibus, precedente fluidi columnâ, superveniens sanguis magnam experitur resistentiam: hinc sanguinis decursus multò longè tardior: hinc in gravissimo versantur errore qui ab arteriâ sectâ, propulsi sanguinis vehementiam in statu sano metiuntur. Sublatâ ingente sanguinis copiâ, debiliior factus æger, supinus in lectum mittitur, pars sanguinis ab utrâque venâ cavâ primò tenuior, deîn fœculentior, deficiente chylo, ventriculum cordis dextrum ingreditur; respirationis motu, in ventriculum cordis sinistrum pellitur; repetitâ cordis systole, aortam ingreditur, arteriæque occurrit apertæ ad ultimam usque mutuam pulmonum & cordis actionem.

SECUNDA EXPERIENTIA. *Liquor coloratus in venam injiciatur, exsiliet per arteriam ex opposito corporis apertam.* Hæc non magis ad probandum conducit quàm prima & eodem modo refellitur.

Arteria etenim secta non solum quem continet fundit sanguinem; verùm etiam adjuvante arteriarum systole, sequentes jam arteriosos pervagans canales, aperturam recurrit sanguis; præterea ad venam cavam citius tendentes cuncti corporis humores, per vehementiorem tunc cordis & pulmonum actionem mutuam, velocius etiam arteriæ occurrunt apertæ.

TERTIA EXPERIENTIA. *Venam ligaturâ constringas, ligaturam inter & extremitates turgebit vena.* Sanguinem ab extremitatibus ad partes medias tendere hæc tantum experienciâ constat. Agnoscere est etenim de centro ad circumferentiam in corpore sanguinis motum, ut non solum partes internæ, verùm etiam partes externæ pabulum accipiant. Per vasa lateralia exiguißima lymphatica novum ab arteriis nestar exhauriunt partes internæ; per millesima etiam vasa lymphatica in venarum capacitate aperta, humorem ad nutritionem-comparatum suscipiunt partes externæ; & si *Sanctorii* supputationibus adhibenda fides, vix sanguinis pars vigesima de venis ad venam cavam in statu sano reducitur. Quàm lentus ergo sanguinis in venas motus! Quàm ideo in venam cavam multò longè lentior!

QUARTA EXPERIENTIA. *Injiciatur in arteriam ligatura, arteria turgebit cor inter & ligaturam.* Hæc nihil aliud probat experientia, nisi sanguinem à corde per arterias primò erumpere.

QUINTA EXPERIENTIA à *transfusione sanguinis* sumitur. Transfusionis autem observatio eodem modo quo primam refellimus experientiam ipsa recusari potest.

In transfusione etenim duæ præter naturam concurrunt causæ; immittentis scilicet in venam sanguinem arteriæ valida systoles, alterâque mediante venâ, largæ sanguinis copię artificiosa detractio. Quâdam tamèn probatoriâ polleret virtute transfusio, si probatum fuisset unquam quòd transfusi sanguinis operatione, ciborum ingestionem quisquam suppleverit. Quantum autèm ab eo distat experientia (1)!

(1) Non latent transfusi sanguinis teterrimè eventus. Vid. *Phil. Trans.*, n. 28, 32. *Santinalli* Rilazione della transfusione, p. 25, 36, 33. *Lettres touchant la transfusion.* Paris, 1668.

SEXTA EXPERIENTIA à ciborum abstinentiâ deducitur. Dira sed abstinentia status est pathologicus. In summâ etenim abstinentiâ, deficiente chylo, sanguis ex suâ saltē residuâ parte lymphaticâ, nihilominus impurâ, denuò ventriculū cordis dextrum adire coactus, crassiorem ex eo in venam cavam inferiorem demittit materiæ copiam. Hinc febres pertinaciores, hinc melancholicorum ineluctabilis morborum origo.

SEPTIMA EXPERIENTIA quæ ab observatione circulationis in animalibus vivis & integris, ope microscopii sumitur, majoris est momenti. Attamen si ad naturæ leges æquâ mente percipiendas nostri habeantur impares sensus, si non sufficiat iudicium Supremi Numinis donum, quomodò ludibrium altiùs conducet mechanicum? Attendite saltem quòd si mediante microscopio, objecti considerati millesies adaucta videatur massa, millesies etiam adauctus videbitur motus. Multoties vasa ex ranis viventibus mesenterica, microscopii ope optimi, consideravimus, & ferè in eadem proportionē quâ pellebatur, sanguinem retrogredi vidimus. Nostros quotidie ludibundi Mechanici decipiunt oculos, fluxumque fluviatilem aquarum simulant, adducendo simul & reducendo latos quàmplures lēniscos in longum gradatim ab invicem dispositos, diverso modo striatos, variisque coloribus instructos.

OCTAVA EXPERIENTIA surgit ex observatione narcoticorum, soporiferorum, acidorum tum mineralium, tum vegetabilium & mercurialium quæ in venas infusa suam absolvunt operationem. Soporifera autem & narcotica fragrantissimo, tenuissimo, mobilissimoque principio donata partes totius corporis divisibiles permeare queunt. Acida mineralis vegetabilis-ve profapiæ, in magnis venarum truncis coagulando sanguinem, equilibrium motus undè pendet vita, citò citius evertunt. Mercurialia ingenti mobilitate, summæque divisibilitatis indole prædita, omnia corporis dædalea facile pervagari possunt. Denique tandem, si arteriæ sint veræ cordis propagationes, si unâ cum ventriculis in contractionem agantur, hæc consentiens contractio ad harveianam circulationem admittendam, summum erit impedimentum (1).

III.

SENIORES undique proclamant Clinici aliam esse medicinam in theoriâ, aliam in praxi, & multoties recentioris Physiologiæ præceptis decepti, omnia abnuunt systemata, & ad similitudinum computationem confugiunt. Pròh Dii immortales! cur theoria quæ in omnibus scientiis contemplatio in breve, sed fidelis omnium rerum ex omni positione, occasione, naturâ, indole & specie depromptarum, quæ ad æquam cæterarum artium applicationem tantoperè inservit, in medicinâ plerumque falleret? ratio in promptu.... Præcipuam theoriæ suæ partem

Tardy & Denys in Galliâ, lethifera transfusionis experimenta. *Phil. Trans.* n. 28, 32, 36, 37, 54. *Duhamel*, Hist. Acad. Reg. Scient. p. 21, 22. *Merclin*, de transfus. sang. p. 25, 85. &c. &c.

(1) Harveianæ circulationis sectatores, huiusce argumenti momentum intellexerunt, & contra posuerunt unâ cum cordis contractione dilatationem arterias experiri. Sed oculis & tactu constat cor & arterias simul contrahi.

non rectè instituerunt Physici Medici. Subiectum medicinæ est cōrpus humanum; corpus humanum est machina hydraulica solidis constans & fluidis. Solida post mortem parùm immutata reperiuntur. Fluida autem quasi in totum evanescent & quicquid ex his superest, maximam experitur mutationem. Necessitatem cognoscendi fluidorum in sano corpore motus brevè intellexerunt Medici, & falsis suffulsi experimentis, tanquàm causa vitæ secundaria circulationis systēma pepererunt, undè majoris momenti consequentias in morbos debellandos eduxerunt, sed fundamento labente, ruit edificium. Immortalis quondam Harveus cordis fabricam & actionem perspicuè demonstravit; quondam sanguinis motum propulsionis in arterias, ascensionis autem in venas palam fecit; satis erat; & inconsultè ultrà non licebat procedere. Ex eò quòd etenim auricula cordis dextra confluens utriusque venæ cavæ videatur, non est sincera philosophiæ per externa signa quidquàm altè judicare. Irruens valdè ruber ex arteriâ pulmonali apertâ sanguis minimè probat; in animale etenim vivente, non potest pulmonalis arteria secari, quin subito totius œconomix subversio fiat, & per largum vulnus infligum, sanguis in omni pulmonum substantiâ contentus, vas apertum recurrit. Præterea fieri potest quòd levissima pars colorans sanguinis, tùm ex venâ subclaviâ, tùm ex venâ cavâ, chylo misceatur, ut pulmonum concurrente tritu, facilius erumpat partium chyli inter se nimis cohærentium, divisio. Hæc autem colorantis materiæ pars minutissima pro nihilo reputari debet. Menti sanæ quoties objicitur partem sanguinis ab extremitatibus reducem idèoque ferè omnibus principiis nutritivis orbatam, cor denuò, rursùm, iterùm & iterùm ingredi, hoc certè toties repugnat. Quoties perpendenti animo videtur circulationem innixam esse experimentis quorum alia in statu præter naturam sunt posita, alia de particularibus ad generalia inconsultè ducunt, toties nulla adhibenda fides. Quoties, ut admittatur circulatio, supponenda est in corde vis ita exuperans leges mechanicas, ut à quocumque medio concipi non possit, toties abneganda venit circulatio. Quid præterea de circulatione censendum, subsequentes si propositiones confirmentur.

Primò: si nova ex auriculâ cordis dextrâ, assignari possit via quâ mediante, sanguinis materia crassior, fœculentior, ad utilitatem totius machinæ, eliminetur.

Secundò: si analysi chemicâ sagaciter exactâ, omnia sanguinis principia in bile reperiamus.

Tertiò: si bilem pro sanguine in utrâque venâ cavâ congesto, eliminari perspicuè videamus.

Quartò: si admissâ harveianâ circulatione, glandularum functiones minimè concipiantur.

Quintò: si harveianæ circulationis inventionem ad medicinam practicam nullum attulisse commodum probetur.

Sextò: si nedum sit in ventriculū cordis dextrum sanguinis ingressus ad incolumitatem vitæ necessarius, in corpus symptomata excitet morbosa.

Septimò: si saluberrimi medicinæ practicæ effectus nostræ thesēos argumentum confirment.

I V.

VENAM cavam superiorem venæ cavæ inferioris quasi perpendicularem esse processum anatomicè constat. In suarum expansione auriculari tunicarum, absque valvulis, os latè apertum præbet utraque vena cava. Nil obstat ergò quin stante imprimis corpore, ad ostium inferioris cavæ, tendat superioris cruor.

Confirmatio
propositionis
primæ.

Ne objicias, velim, neque cordis attractionem, neque ab inferiore venâ cavâ indefinentem sanguinis affluentiam. Si etenim portuncula tantum fluidi exiguissima in statu sano, per quemque systolis motum, pellitur; exigua etiam in quoque dyastolis motu, pars fluidi fugetur; proindeque ista attractio, pro nihilo reputari poterit. Si ut suprâ annotavimus, in venam cavam ab extremitatibus inferioribus rediens summâ morâ, moveatur sanguis, ultrâ venam portarum stante imprimis corpore, procedere minimè debet; ab extremitatibus autem superioribus redux sanguis, in ventriculum cordis dextrum demissâ portione chylosâ (1) cujus tantum erat ipse vehiculum, venam cavam inferiorem subibit, paulatimque ingreditur hepar, mediantibus venis hepaticis dictis, quæ magnum lobum inter & lobulum *Spigelii* conspicuè diffunduntur in hepatis substantiam. (2)

Confirmatio
propositionis
secundæ.

Nostrâ jam ex sententiâ, bilis non est liquor à sanguine segregatus, verum equidem sanguis ipse qui per altas in hepate moras, decomponitur. Omnia etenim in bile constitutiva sanguinis principia detegunt Chymistæ: (3) nempe partem ferrosam, partem fibrosam, partem colorantem (4) partemque resinofam cujus integrantes moleculæ per sanguinem totius corporis sparsæ, affinitatis in hepate legibus coacervantur.

(1) Huic sententiæ multum arridet observatio nuper nostris in ædibus anatomicis facta; nempe concretiones lymphaticas, albumini ovorum longâ coctione indurato haud assimilables, in auriculâ dextrâ, in ventriculo cordis dextro, in primis arteriæ pulmonalis divisionibus, ad quantitatem usque incredibilem reperimus.

Palpitationes, syncopes, asphixia in primo gradu invictè probant cor, in unoquoque dyastolis motu, eandem non accipere, nec eliminare fluidi copiam, omnis etenim pulmonum quandoque actio suspenditur, & tamen cor æquè pulsat. Cum ergo quâlibet de causâ, majoribus in arteriarum divisionibus morari cogetur sanguis, cor quinque, sex, septem & ultrâ dyastoles & systoles absque novâ exceptione & demissione fluidi experietur. Ex opposito autem, cum quâlibet de causâ, pulmonum & aortæ citius fluat sanguis, cor in quoque dyastolis & systolis motu, accipiet & emittet majorem fluidi copiam.

(2) In jecore, venarum hepaticarum ramificationes tantum à ramificationibus venæ portarum discrepant, in eo quod tunicâ *Glissonis* careant. *Winslow*, tract. infim. ventr.

Præter venas hepaticas majores, sunt etiam minimæ venæ quæ arteriæ hepaticæ ramificationibus respondere videntur. *Winslow*, tract. de venis.

(3) Evolve codices chymicos celeberr. *Roux* in Scholarum amphitheatro scriptos ann. 1774, 1775, &c.

(4) Quid fieret de colorante sanguinis materiâ, si hæc assidue formata, quotidie non eliminaretur? Quot & quanta œconomix animali afferret mala! Non absque controversiâ, affirmare possumus partem lymphaticam, vel fibrosam bilis, chylo misceri in intestino duodeno dicto; tum quia iacente amaritudine prædita est bilis, de quâ tamen planè expers chylus; tum quia bilis ad tantam putredinem disponitur, ut cum per haud longum temporis stadium, sibi relinquatur, ipsa odorem summè cadaverosum & putrefacientem acquirat. Undè existimari potest quod in magnam partem, fœcalem massam ingrediendo bilis sit reipsâ causa odoris teterissimi fœcum, & virtute tantum tonicâ gaudeat.

O miranda nec non salutifera catharticonum quæ prudenti exhibentur manu potestas, non immerito sub nomine Medicinæ universalis excipiuntur (1) non solum humores pituitosos, serosos &c. eliminant; verum etiam in tempore opportuno, massam hepaticam commovendo, hepar, partes ejus proximas & equidem totam machinam supervacuo & nocivo facto allevant sanguine. Exhausto etenim cathartico, viginti plerumque biliosas dejectiones molitur æger (2) unde hepatis actionem, in venam cavam utramque redeunti, aut appellati sanguinis copiam, utcumque respondere concludendum venit. (3)

Confirmatio
propositionis
tertiæ.

Si venæ portarum partes residuæ sanguinis, venis mediantibus hepaticis quæ ex diametro, fermè venam portarum adæquare videntur, ad venam cavam redirent, quàm pars sanguinis exigua deponeretur in hepate! quàm ideo inutilis reputaretur immensa hepatis substantia! (4)

Glandulæ ex *Ruischio* sunt corpora solida circumdata membranâ, innumerabilibus omni generis vasis, ambitu Dædaleo, instructa, ad humores separandos in omni corpore comparata. Separatio autem est actio semispontanea, semimechanica quâ primò sanguinis à massâ, fluidissimi humores lentè separantur, quâ secundò humores fluidissimi per exiguissima vasa inextricabili modo comparata lentam experiuntur transmigrationem. Dùm autem in glandularum Mæandris morari cogitur sanguis, quomodo in omni dyastolis motu, corripit duas fluidi redeuntis uncias auricula cordis dextra? Præterea, si juxta harveï sententiam, citò citius fluere sanguis, nullam acciperent fluidi copiam corpora glandulosa, & sanguis, vasorum neglectis minimorum ostiis, quâ datâ latiore viâ, erumperet.

Confirmatio
propositionis
quartæ.

Nullus est sanæ mentis homo qui non intelligat quòd harveïana circulatio medicinâ practicâ confirmari debeat, vel saltem medicinæ practicæ lumen afferre splendidius quo à neotericis tutius curentur morbi. Praxi tamen nedùm harveïana confirmetur circulatio, stupefactis adstantibus, quotidie sub circulationis auctoritate, venæ sectionum prorsus victima, perit æger. Nedùm à neotericis tutius curentur morbi; in praxim feliciorum incumbunt clinici qui, Medicorum antiquitatis, sententias, scripta, observationes, sæpè sæpius evolvunt, & altâ mente reponunt.

Confirmatio
propositionis
quintæ.

(1) Apud Gallos potio purgans dicitur (*Médecine*.)

(2) Nullum fugit Clinicum, immensa humorum biliosæ indolis copia quæ in febribus mesentericis & hepaticis dictis, minimo adjuvante cathartico, foras amandatur.

(3) In morbo nigro dicto videntur homines per hebdomadem integram & ultra, sanguinem atrum vomitu & alvi fluxu mirandâ ejicientes copiam, & cum evolvuntur viscera hominum pari morbo functorum, quandoquæ atro sanguine turget hepar, & canalis choledocus, venæ instar, luxuriatur sanguine, dum cæteræ corporis partes oculis subjiciuntur exangues.

(4) In statu physiologico, fœcales materiæ plus minusve flavescunt, virescunt, & in alvo tardiore nigrescunt. Per analogiam non rationi alienum est inferre mœconium nihil aliud esse quàm sanguinis partem biliosi qui in ultimis gestationis temporibus, à venâ portarum in duodenum descendit & in alvo coacervatur, quod forsàn ægrè ferens fœtus, agitur & in statu naturæ sanæ, cunâ tandem apertâ, in auras evolvitur.

Confirmatio
propositionis
sextæ.

Nostrâ tamen ex sententiâ, introductio sanguinis à venâ cavâ, in cor, duplici modo fieri posse videtur. Per inflammationes internas : per obstructionem hepatis.

Per inflammationes internas : succedens suppurationis materia in alvum venosum truditur. (1) Hinc, mixto sanguini pus irruens, ita venam cavam utramque occupat, ut admittendo chylo nullus detur locus. Indè appetitus prostratus, repletiones, nausea, vomitus, &c. &c. Sanguineo-purulentâ stimulatam cor materiâ, in contractiones movetur frequentiores ac magis intimas; hinc febris, anhelosa respiratio, suffocatio. Si summè acuta videtur febris, primo quaternario vel septenario, per hæmorrhagiam ex naribus, si non admittæ fuerunt venæ sectiones, per alvi fluxum, si primò cathartica non fuerunt exhibita, morbus plerùmque solvitur.

Per obstructionem hepatis, sanguis ab extremitatibus, ad utramque venam cavam redux, in ventriculum cordis dextrum, unâ cum chylo ingredi coactus, omnem corporis substantiam pervagans, morbum Regium constituet. Inflammationem valdè ardentem circâ cutim à bilioso sanguine ortam, Erespelas nuncupant Medici. Longâ jam noscitur experientiâ herpes ab hepatis impedimento lucere natalitia. (2) Ergo nedùm sit in ventriculum cordis dextrum reducis ingressus sanguinis ad incolumitatem vitæ necessarius, in corpore è contrâ, symptomata excitat morbosa.

Confirmatio
propositionis
septimæ.

In senibus, vertigines, apoplexiæ &c. hepatis obstructionem plerùmque cognoscunt, & quando per hæmorrhoides spontaneas, aut sagaciter appellatas, compensatur hepatis actio, evadit senex incolumis; quòd si hæmorrhoides in posterum incautè supprimentur, vel paralyâ laborat, vel apoplexiâ subito obruitur.

Venam cavam superiorem inter & venam cavam inferiorem tantum adest commercium, ut hyrudinibus venis hæmorrhoidalibus applicatis, magna sanguinis à capite copia in venam cavam inferiorem derivetur. Absolutâ etenim hyrudinum operatione, subsidens summâ syncope plerùmque afficitur æger qui stans, remansisset inconcussus, etiamsi sextuplum è brachio elicatum fuisset sanguinis.

Venam cavam superiorem inter & venas hepaticas tantum adest commercium, ut ictus capiti vehementer inflictus hepatis abscessum plerùmque constituat (3).

V.

ULTIMAM tandem navavit operam errori iste Sillogismus in formâ. « Ven-
» triculus cordis dexter in quoque dyastolis motu corripit duas fluidi uncias,
» undè per unum horæ minutum libras octo, undè per horam integram,
» ducentas & octoginta libras; atqui chylus non potest in tantâ quantitate exhi-
» beri; ergo necesse est ut sanguis redeat fluidum cordi suppeditaturus. » (4)

(1) Venæ sectionum quæ tunc celebrantur materia, hanc transmigrationem humorum purulentam abundè confirmat.

(2) *Herpes biliosus procreat succus.* Galen. Method. med. lib. 14, cap. 9.

(3) *Ex observatis celeberrim.* Bertrandi, Pouteau, David.

(4) Ridere simul & ingemiscere nostrum est insuper pueriles *Leuwenhœckii* numerorum in Physiologiâ comparationes, & ægrè ferimus celeberrimi *Hallerii* æquationes algebras. Corporis functiones tot & tantarum mutationum capaces, immutabilibus matheos legibus obtemperare nequeunt.

Major argumenti propositio summè deneganda venit quoniam gratis & temerariè ponitur. Ex eo quòd etenim sex alimentorum libras ventriculus abdominalis recondere queat, non inde sequitur quòd in quoque deglutitionis motu, sex alimentorum libras corripiat. Præterea quando in consumptione heticâ, jam dudum omnem cibum & potum renuens perit æger; in quoque dyastolis motu, quatuor sanguinis uncias posset-ne corripere ventriculus cordis dexter, cum in omni cadavere, vix duæ superfuitis fluidi libræ reperiuntur? Quò magis in cordis structuram mentem intendimus, eò majorem cor inter & ventriculum abdominalem analogiam reperimus (1) ità ut nullum nobis quasi supersit dubium quin cor sit verè ventriculus alter, eò minoris capacitatis, quò puriores & magis homogeneæ ei occurrant alimentariæ materiæ. Ventriculi intestinorumque motui peristaltico, dyastolis systolisque cordis & arteriarum motus optimè respondet, verum etiam si præter ventriculum qui debilioribus, rarioribus fibris gaudet muscularibus, cor ex opposito, multis inter se validissimè coacervatis fibris gaudeat muscularibus; hæc differentia, resistentiæ quam à propulsâ materiâ organum experitur utrumque, respondet. In ventriculo etenim de levissimâ in duodenum superenatantis ad ostium propulsione fluidi tantum agitur: in corde autem, non tantum de propulsione fluidi, verum etiam de totius resistentiâ sanguinis contra leges hydraulicas ascendents, agitur. Si suis pro caveis, ad uncias emittendas fluidi quatuor, cordis contringerentur ventriculi, ex mediò certè suo volumine, in contractione minueretur organum. Nullibi attamen hanc observationem insignitam reperimus, & nisi paululum expallescerent fibræ cordis externæ, adesset tantum cernere quemdam librationis motum. Quàm minutissima ergo cordis est contractio! Quàm perindè fluidi expulsi pars exiguissima! Immo si contrà nostræ thesæos argumentum ponatur nutritio fœtus, & quæratur quomodo sanguis à matre nutriens possit auriculam cordis dextram adire, cum ab extremitatibus superioribus cruor redux à venâ cavâ superiore, in venam cavam inferiorem assiduò descendat; palàm faciemus fluidum à matre nutriens per venam cavam inferiorem fœtum accipere eodem modo quo in lucem eruptus, à venâ cavâ superiore chylum accipiet; dum sanguis ab extremitatibus superioribus redux, per venas thoracis internas valvulis carentes, ideòque per millefimas vias in se communicantes, & imprimis per portionem venæ azygos descendentem ad venam cavam infra tamen canalis venosi insertionem, mediatè vel immediatè exportatur. (2)

Si per analogiam, non indecorum est procedere, ad exportationem morantis sanguinis utriusque venæ cavæ uberrimè valet canalis choledocus, cum ad exportationem irruentis chyli sufficiat canalis thoracicus.

(1) Non omninò rationi aliena videbitur hæc comparatio, si attendatur quòd vermes corde careant, & quòd ad eorum actionem organicam, sufficiat canalis oblongus intestinalis.

(2) Parum abest ut credamus quòd in lautis epulis, summâ in quantitate irruens chylus, non solum auriculam cordis dextram, verum etiam venam cavam superiorem, portionemque venæ azygos ascendentem, &c. adimpleat, dum ab extremitatibus superioribus redux sanguis per altera vasa, & imprimis per portionem venæ azygos descendentem ad venam cavam inferiorem exportetur. In omni etenim systemate vasorum interno valvulis prorsus carente, non deneganda sunt ostia communicationis innumerabilia, à quibus tam diu vita stat inconcussa; à quibus, per metastases, celerrimè morbi acutiores sanantur; à quibus etiam, plerumque, subito, machina obruitur.

Si ad actionem ventriculi cordis sinistri, sufficiat fluidum à venis pulmonalibus exhibitum, à fortiori, ab utrâque venâ cavâ redux sanguis ad actionem ventriculi cordis dextri sufficere deberet, hinc nova chyli admissio inutilis, proindeque immortalitatis donum, si nulla fieret perspirationis materiæ deperditio.

Ne dicant alii quòd tubulo vitreo extremitatibus duarum venarum quarum pars media tollitur adjecto, sanguinis ingentem conspexerint ascendentis velocitatem. Primò etenim, parietes vitri citò citiùs æstuantis sanguinis caligine obnubilantur; Secundò, iste sanguinis progressus nil probaret, quoniam irritatæ venæ majorem sanguinis fluxum appellarent in arterias undè cruorem ipsæ accipiunt.

Postremò tandè, cave ne objicias nobis actionem catharticorum quæ in venas infusa, in ventriculum & in alvum suam tamen absolvunt operationem: nam si testante *Borrichio* (1) eadè dosis quæ deglutiri solet purgantium, in venas infusa, alvum movet, certe à venâ cavâ in hepar, ab hepate, mediante ductu choleodoco, in duodenum pergit medicamentum.

Ergo ex omni utriusque venæ cavæ sanguine, bilis formatio.

(1) *Borrichii tract. de sanguine*, p. 84.

DOMINI DOCTORES DISPUTATURI.

M. Alphonsus Vincentius Ludo-
vicus Antonius LE RON.

M. Joannes - Mathæus DE
FRASNE.

M. Joannes-Baptista JUMELIN.

M. Joannes-Jacobus DE LA
PORTE, Regis in portu Bré-
tensi nuper Medicus.

M. Thomas LETENNEUR.

M. Felix VICQ-D'AZIR, è
Regiâ Scientiarum Academ. iâ
Serenissimæ Comitissæ Aurebatum
Consiliarius Medicus, Regii
Medicorum Nanceianorum col-
legii Socius honorarius.

M. Petrus - Joannes - Claudius
MAUDUIT DE LA VA-
RENNE.

M. Stephanus GROSSIN DU
HAUME.

M. Joann. Armandus ROUSSIN
DE MONTABOURG.

Proponebat Parisiis, JOANNES-BAPTISTA CALMÉ, Rhemus, Medicus Doctor
Rhemensis, nec-non Saluberrimæ Facultatis Medicinæ Parisiensis Baccalaureus,
Theseos Auctor.

A. R. S. H. 1787. AB OCTAVA AD MERIDIEM.



Typis QUILLAV, Universitatis & Facultatis Medicinæ Typographi,
viâ dictâ du Fouarre, 1787.